



UNIVERSITÄTS-
BIBLIOTHEK
PADERBORN

**Bellum Sacrum Ecclesiae Militantis Contra Turcum
Communem Hostem Christianorum**

Vaux, Léonard de

Leodii, 1685

§. I.

[urn:nbn:de:hbz:466:1-64991](https://nbn-resolving.org/urn:nbn:de:hbz:466:1-64991)

NUMERUS SECUNDUS.

Oportet Principes Christianos unitis armis præliari cum lætitiâ, prælium Christi contra inimicos Ecclesiæ, nec ulli fas est juvare hæreticos rebelles contra legitimum Principem.

§. I.

Agite ergo Principes generosi, pergite magnis animis, opus felicibus adeò auspiciis cœptum conficite, paribus studiis rebellem Calvinii hæresim penè avulsam stirpitibus ubilibet eradicatè: quare procul absit à Christiano fidelium pectore, ut hæreticos contra orthodoxum suum Principem rebellantes, adjuvare aut fovere satagat. Qui enim hæreticos juvat, hæresim juvat & propugnat, ipsamque Christi fidem & Ecclesiam oppugnat. Qui rebelles juvat, rebellionem juvat & propugnat: quocirca justo Dei iudicio reddetur ei talio, ut in quo peccavit, in eodem puniatur, & ab hæreticis bello à subditis rebellionem exagitetur. Sapienter Thucidides Lib. 1.

Nullus, inquit, à suis subditis justè puniendis arcendus est. & qui id facit parem in se legem statuit, ne & ipse suos puniat delinquentes. Ita gravem non tantùm cenuram sed & vindictam Dei subiit Josaphat pius alioqui Rex Juda, quando oraculo Jehu castigatus audivit: *Impio præbes auxilium, & his qui oderunt Dominum amicitiam jungeris: & idcirco iram quidem Domini merebaris, sed bona opera inventa sunt in te, eò quod abstuleris lucos de terrâ Juda, & paraveris cor tuum ut requireres Dominum.* 2. Paral. c. 19. Graviorem verò excepit ab Eliezer Prophetâ in eum detonante, 2. Paral. 20. *Quia habuisti fœdus cum Ocoziâ, percussit Dominus opera tua, contritæque sunt nares, nec potuerunt ire in Tharsis.* Et tamen Josaphat Ocoziam adjuverat non in impietate, sed in re politica dumtaxat, nimirum ad navigandum in Tharsis. Porro verissimum est istud, licet nonnullis paradoxum, quamobrem sapientes Consiliarii hoc suis Principibus instillant principium: *Ut tuum regnum firmes & amplifies, omni studio cole pacem & fœdus cum vicinis Christianis*

Principibus, horum enim amicitia tibi erit murus & antimurale. Nam ut ait Rex sapientissimus, Prover. 18. Frater qui adjuvatur à fratre, quasi civitas firma. Quin & Atticus Orator, Precipuum, ait, boni Principis opus est, amicos parare, nullum enim majus boni imperii instrumentum, quàm boni amici.

Audiant Christiani saluberrimum Anchisæ apud Virgilium, Romanos à civilibus bellis dehortantis consilium: *Ne, quaeso, ne tãta animis assuescite bella, Neu patria validas in viscera vertite vires.*

Christiani unum Deum Patrem omnium invocant: En unum Christum omnium Salvatorem credunt, uno eodemque Baptismate ad eandem vitam æternam regenerati sunt in visceribus ejusdem Ecclesiæ, quam ut matrem colere & diligere debent, & se mutuò ut fratres: si in illis est vel minima scintilla charitatis, junctis animis & armis communem Christiani nominis hostem oppugnent, haud dubiè debellabunt. Deus exercituum magnificus in sanctitate, Principibus sibi fidelibus facit mirabilia magna solus, cui proinde,

tota Germania, tota Gallia, tota Polonia, imò totus Orbis Christianus, ob tantas tamque recentes victorias cum gratiarum actione Canticum Moyſis concinat. Cantemus Domino, glorioſè enim magnificatus eſt, equum & aſcenſorem projecit in mare. *Exod. 15.*

§. II.

Eia Sanctiſſima Trinitas! tribus virtutis tuæ lanceis, tuâ inquam potentiâ, ſapientiâ, & gratiâ, trium hoſtium tuorum, pariter ac Prophetarum, & Apoſtolorum, ac totius Eccleſiæ tuæ militantis; videlicet Saracenorum, Hæreticorum, & Schiſmaticorum mentes, cordaque feri & ſaucia; ut omnes ſeſe tibi Deo uni trino ſubdant, te cognoſcant, adorent, credant, ament & glorificent: pſallentes nobiſcum in unum, Gloria Patri & Filio, & Spiritui Sancto: Sicut erat in principio & nunc & ſemper, & in ſæcula ſæculorum, Amen. Tunc tuæ Divinæ Majeſtati & clementiæ, verè & exultanter omnium gentium jubilis illud regii Vatiſ oraculum jubilabimus.